

Codotenteidi inānite Pabodo nānō cadota ante yewæmongainta

Waa quëwencæminimpa, ante

¹ Wængonguī angā ēñēninqe Itota Codito botō imote da godongā gogaīmo inte botō Pabodobo inōmo inte yewæmōmopa. Mōnō tōniñacā Tīmoteo tōnō guēa tedete ate botō, Acæminimpa, ante yewæmōmopa. ² Mōnitō tōniñamīni ēñēedāni. Codota iñōmō quëwēninqe Wængonguī quīmīni inte mīnitō mōnō Codito nempo quëwēninqe ædæmō cæte pōnēmīni iñōmīnite botō iīmaī ante yewæmōmopa. Mōnō Mæmpo Wængonguī tōnō mōnō Awēñē Itota Codito waadete pōnō cæda ænte entawēninqe mīnitō gāñē pōnēninqe watapæ quëwencæminimpa, āmopa.

Nē pōnēnāni beyæ Pabodo Wængonguī ingante apæneccā

³ Mōnō Awēñē Itota Codito Wæmpocā iñongante mōnitō mīnitō beyæ ante apænedinqe Wængonguī ingante waa ate pōnente apænemōnīpa. ⁴ Edæ, Mīnitō Itota Codito ingante wede pōnēmīni imīnīpa, ante do ēñēmōnīpa. Ayæ, Wængonguī quīnāni inānite tōmānāni inānite mīnitō waadete pōnēmīnīpa, ante mōnitō do ēñēmōnīpa. ⁵ Edæ, Öönædē æidinqe mīnitō watapæ quëwenguinqe impa, ante edæ Codito do badongampa. Mānōmāinō ante, Nāwangā impa, ante watapæ mīni ēñēnō ante mīnitō godōmenque wede pōnēmīni badinqe godongāmæ waadete pōnēmīni imīnīpa. Ininqe, Mīnitō mānōmaī imīnīpa, ante adinqe mōnitō wæætē Wængonguī ingante waa ate pōnēninqe apænemōnīpa.

⁶ Doyedē mīnitō weca ponte apænedinque mōnitō, Mōnō Codito ingantedō ante watapæ apænemōni ēñēn-
inque mīnitō, Wængonguī nāwangā waadete pōnō cæ-
campa, ante do ēñēmīnitapa. Mānōmaīnō ante mīni
ēñēniōnæ incæ mīnitō waincawæ nanguī incawæ bai
tæcæ badinque ñōwo ganca nanguī apænemīni ēñēn-
inque wadāni mīnitō weca nē pōnēnāni tæiyænāni
badānīpa. Ayæ tæiyænāni badāni bai mōnō pōnencabo
adobai tōmāmæca tæiyæmō pōnī bamompa. ⁷ Epapada
mōni nē waadedongā incæ, Codito waa pōnī nānō pōnō
cægaiñō ante do odōmonte apænecā ēñēmīnitapa. Tō-
mengā iñōmō Itota Codito beyæ nē cæcā inongā inte
mōnō imōnite pōnēninque ædæmō cæcā ingampa. ⁸ Ayæ
mōnitō imōnite apænedinque tōmengā, Codotenteidi
iñōmō Wængonguī Ōnōwoca nempo quēwēninque nē
waadete pōnēnāni inānīpa, ante do apænecā ēñen-
tamōnīpa.

⁹ Mānōmaī beyæ mōnitō, Mīnitō æbānō imīni, ante
tæcæ ēñēninque mīnitō beyæ ante Wængonguī ingante
apænedinque ñimpo cædāmaī inte cōwē apænemōnīpa.
Edæ, Wængonguī æbānō angāā, ante mīnitō ēñente
ēwocacæminīpa, ante mōnitō, Wængonguī ēñēmi. Bitō
ēñēnō ante apænebi ēñente ēwocadinque Codotenteidi
wæætē, Æbānō waa cæte quēwenguīi, ante ēñencædān-
īpa, ante apænemōnīpa. ¹⁰ Wængonguī apænecā ēñēn-
inque mīnitō, Mōnō Awēnē tocæcāīpa, ante cædinque
tōmengā nānō waa cædō bai mīnitō adobai waa pōnī
cæcæminīpa, ante apænemōnīpa. Ayæ Wængonguī in-
gante mīnitō doyedē æmæ ate bai æmæ pōnēnimīni inte
ñōwo wæætē ædæmō ate bai ædæmō pōnencæminīpa.
Ayæ waa incawæ bai mīnitō adobai bate cædinque nō mīni
waa cæquēnēnonque cæcæminīpa, ante apænemōnīpa.
¹¹ Wængonguī ñāō emōninque tæ pīñænongā inte pōnō

cæcä ate mīnitō edæ tōmengä nänō tæi piñænō bai adobai tæi piñæmini ewocacæminimpa, ante apænemōnīpa. Ayæ, Tōmengä mänōmaī pōnō cæcä ænte ewocamini inte mīnitō wæntæye badāmaī inte ee cædinque piyænē cæte ee cæcæminimpa, ante ämōnīpa. Ayæ watapæ todinque,¹² mīnitō mönō Mæmpo ingante waa ate pōnēn- inque apænecæminimpa, ante mönitō Wængonguī ingante apænemōnīpa.

Edæ Wængonguī quimōni imōni bai tōmengä mīnitō imīnite pōnō badongä ate mīnitō tōmengä quimīni do bamīnīpa. Inique mīnitō tōmengä ñäo emōmämodē mönitō tōnō godongämæ pōñōmīnite tōmengä nangui pōni pōnongä æninque mīnitō mönitō tōnō godongämæ nē äamini incæminimpa.¹³ Edæ nē wēmō enem- podongä nempo wæwēñōmonte Wængonguī wæætē mönō imonte gä pe æmpote ö æninque, Botō Wengä botō nē Waadedongä iñōmō nē Awēnē Odeye iñongante mīnitō tōmengä nempo quēwencæminimpa, ante mämōngä pongamōimpa.¹⁴ Tōmengä Wengä nämä wepæ petæ petæ wææ beyænque mönō wēnæ wēnæ cægaiñō ante Wængonguī pōnō ñimpo cæcä æninque mönō abæ tawænte bai quēwēmōmpa.

Codito wængä beyænque Wængonguī piyænē cæcampa

¹⁵ Mönō adāmaī ingaingä Wængonguī æbänō emōngää, ante adāmaī iñōmonte Wængonguī Wengä iñōmō Mæmpocä bai nē emōngä inte mönō weca pōninque, Mæmpocä æbänō emōngää, ante do odōmongacäimpa. Wēēñēñedē Wængonguī nänō badōnāmaī ingäñedē adocä incæ Bamoncadengä bai iñongä inte do quēwengacäimpa.¹⁶ Inique Mæmpocä pōnō angä eñēninque tōmengä Wengä incæ tōmancoo edæ badongacäimpa. Mönō nē adincoo incæ mönō adāmaī incoo awēmō ongoncoo incæ adocä tōmancoo badongacäimpa. Awēñēidi incæ

nē änäni incæ, awënëidi näni ënempodö incæ nē täei pīñænäni incæ, öönæde owodönäni incæ inguipoga quëwënonäni incæ mäninäni edæ tömänäni inänite Mæmpocä pönö angä ëñëninque Wængongui Wengä iñömö badongacäimpa. Badöñongante Wæmpocä, Bitö qui bacäimpa, angä Ao ante badongacäimpa. ¹⁷ Adocä Wængongui Wengä incæ Tānocä quëwengaingä ingampa. Tömengä pönö angä beyænque tömengä nänö badongaincoo iñömö adoyömö pönente bai cædinque tömengä nempo godongämæ gongænte cægompa.

¹⁸ Ayæ tömengä nē Önoncamö bai nē angä iñongante mönö tömengä ingante mönö godongämæ pönencabo wæetë tömengä tönö adoyonque bai inömö imompa. Adocä tömengä nänö Tæiyæ Awënë baquinque nē badongaingä inongä inte tänocä pöni ingacäimpa. Ayæ æmonga pöni nänö ongonguinque tömengä wænte ate tänocä nē ñäni ömæmongaingä inongä ingampa. ¹⁹ Edæ, Botö entawënö incæ botö Wengä tömänö entawencæcäimpa, ante pönö cædinque Mæmpocä iñömö nangui togacäimpa. ²⁰ Ayæ tömengä Wengä wepæ awäa gowete wædinque wængä beyænque Wængongui mönö tömämö beyæ pönö cædinque piyænë cægacäimpa. Tömengä Wengä tönö mänömai pönö cæcä beyænque mönö inguipoga tömäo quëwëmö tönö öönæde tömäo quëwënäni tönö tömengä ingante Ao äninque tömengä tönö godongämæ piyænë cæte quëwëmö adinque Wængongui iñömö nangui togacäimpa.

²¹ Ayæ minitö guiqüënë Wængongui ingante näwæ pämente gogaimini inte wiwa cædimini inte ocaidë nē piinte bagaimini iñöminite, ²² Wængongui wæetë, Adocä Codito tömengä baö ëwënente wængä beyænque minitö botö quimini badinque botö ayömo tæiyæ wæmö entawencæminimpa, ante cæcampa. Ininque tömengä

ñä mēnongacā ate mīnitō tōmengā ayongā wentamō mongænāmaī īmini adinque, Wēnæ wēnæ cæbitapa, ante ædō cæte pīinte anguiī. ²³ Edæ mīnitō tæī mænonte bai ongōninque do mīni wede pōnēnonque ante cōwē godōmenque pōnēmīni īninque tōmengā weca ponte ongōmaīmīnīpa. Mōnitō mōnō Codito ingantedō ante mōnō pōnēnō beyæ mōnō watapæ bacæimpa, ante apænemōni ēñēmīnitawo. Mānīne ante ñimpo cædāmaī īmini inte mīnitō tōmengā weca cōwē ongōmaīmīnīpa. Mānīne mīni ēñēnīne ante mōnitō ñōwo inguipoga tōmāo quēwēnāni īnānite apænemōni ēñēnānīpa. Mānīne beyænque ante botō Pabodobo nē cæbo batabopa.

Mōnō pōnencabo beyæ botō nē cæbo batabopa, ante

²⁴ Mīnitō beyæ nanguī cædinque nantate wædīmo incæte botō nanguī tobopa. Ayæ Codito beyæ ante godōmenque wæquēnēmō inte botō tōmengā tōnō guēa baonque nantate wæbopa. Codito mōnō Ōnoncamō bai nē angā īñongante mōnō tōmengā ingante mōnō godongāmæ pōnencabo īñōmō tōmengā tōnō adoyonque bai īmōmpa. Botō īñōmō edæ mōnō cabo beyænque caate wæbopa. ²⁵ Ayæ, Codito ingante nē pōnēnāni beyæ bitō nē cæbi badinque botō angāine ante adodō adodō ante tōmānō ante edonque pōnī apænebi ēñencædānīmpa, ante Wængonguī angā ēñēninque botō mīnitō beyæ nē cæquēnēmō do bagaboimpa.

²⁶ Mānīne Wængonguī nānō angāine ante wantæpiyæ wē wodonte bai īñonte mōnō mæmæidi cōwē ēñēnāmaī ingadānīmpa. Nōwo guiquēnē Wængonguī tōmengā quīmō īñōmonte mānīne ante edonque pōnī odōmonte apænecā ēñēmōmpa. ²⁷ Īninque mōnitō imōnīte āninque, Waa pōnī botō angāine ante mīni waocabo wēēnēñedē mīni ēñēnāmaī ingāine ante mīnitō ñōwo tæcæ ēñēmīni inte oodeoidi īnāmaī īnāni īnānite odōmonte apænēmīni

ēñencædānimpā, ante Wængonguī cæcampa. Mänömaī beyæ mänine ante apænemöni ēñēninquē mīni waa pōni ñāō bai entawenguinquē ēñencæmīnimpā. Edæ, Mīnitō mönō Codito ingante ēwocadinque mīni ñāō emāmodē æiyōmīni watapæ bacæimpā, ante mönō pōnēnō ante mänineque impā.

²⁸ Mönō Codito tömengä nänō ēñēnō ante entawēninquē mönitō adocā ingante mönō Codito ingante ante apænemōnipā. Tömengä nempo quēwēninquē mīnitō picænāni bai nē ēñēmīni bayōmīnite Wængonguī mīnitō imīnite waa acæcāimpā, ante mönitō tömänāni inānite waadete odōmonte apænemōnipā. Ayæ, Eñenguēnē quēwēedāni, ante tömänāni inānite wææ ante apænemōnipā. ²⁹ Mönō Codito nänō tæi piñænō pōnongä ænte entawēninquē botō, Nē ēñēmīni bacæmīnimpā, ante cædinque tæi pæ pagænte cōwē nanguī cæbo imopā.

2

¹ Botō mīnitō beyæ nanguī cædinque Daoditea iñōmō quēwēnāni beyæ adobai nanguī cæbo aedāni. Ayæ wadāni botō awinca adāmaī ināni beyæ adobai tæi pæ pagænte cædinque nanguī cæbopā, ante apænebo ēñēedāni. ² Botō, Tömānāni wæwēnāmaī inte wampo pōnēninquē godongāmæ waadete pōnēninquē adocabodāni bai bacædānimpā, ante ædæmō cæbopā. Edæ, Mänömaī badinque tömēnāni Codito nänō ēñēnō ædæmō pōni nāni entawenguinquē impā, ante pōnēninquē cæbopā. Ayæ, Mänömaī badinque tömēnāni Wængonguī nänō nē wē wodongaingä ingante Codito ingante edonque acædānimpā, ante botō mänömaī beyæ ante ædæmō pōni odōmonte apænebopā. ³ Edæ, Æbānō i, ante, Æbānō waa cæquīi, ante Wængonguinquē nänō nō pōnēnō incæ mönō Codito mäninō tömänō ante ēñēninquē waēmō

pöni incoo bai wë wodonte mante bai entawengampa. ⁴ Mänömainö ante apænedinque botö, Minitö oda cædämaï incæminimpa, ante yewæmonte apænebopa. Edæ wadäni waa pöni tededäni incæ babæ wapiticæ odömoncæte ante tededäni inäni adinque ëñenämaï iedäni, ante wææ ämopa. ⁵ Edæ wayömö quëwëmo incæ minitö weca owote bai botö önöwoca pönëmopa. Ininque botö ayömo minitö mönö Codito ingante wede pönente täi piñante ongöninque iñacabo cædinque töingä pöni cæminipa, ante pönëmopa. Mänömaï iminipa, ante ate bai adinque botö nanguï tobopa.

Codito nempo quëwëninque miimö quëwëmompä, ante

⁶ Mänömaï beyæ botö iïmaï ämopa. Minitö Itota Codito ingante mönö Awënë ingante Ao ante do æminitawo. Ininque tömengä ingante do Ao ante ænimini inte minitö ñöwo adobai tömengä ingante cöwë Ao ante tömengä nempo quëwëedäni. ⁷ Minitö waomini incæ awæ täimöwæ ædæmö guiwate pæwæ bai Codito nempo quëwëninque cöwë godömenque picæmini bacæminimpa. Ayæ mönitö odömonte apænemöni mini ëñenö bai cædinque godömenque wede pönëninque täi piñante ongöedäni. Ayæ Wængongui ingante waa ate pönëninque watapæ apæneedäni.

⁸ Wadäni mä pönente önonquedö ante apænedäni ëñente wædinque minitö, Mönö imonte ö æncæte ante babæ apænedänipa, äninque wææ cæedäni. Edæ tömënäni dicæ Codito nänö odömonte apænegaïnö ante apænedäniyaa. Wæætë waodänique nani odömonte apænegaïnönque ante Ao äninque tömënäni ingui-pogaque ante në pönënäni nani pönënö bainonque ante cædänipa töö.

⁹ Edæ Wængongui tömengä nänö entawënoncoo incæ mönö Codito Waocä nē ēñagaingä ïnongä inte mänincoo tömancoo entawëninque nämä baonga ēñacampa. ¹⁰ Öönädē awënëidi incæ inguipoga awënëidi incæ nangui ïnāni ïñönāni mönö Codito adocanque Nænængä pönï ïnongä inte Tæiyæ Awënë ïnongä ingampa. Incæte tömengä nempo quëwëmini inte minitö tömengä nänö entawëno incæ ædæmō entawëminipa. ¹¹ ïnque tömengä nempo quëwëninque minitö wao önompoca eö togænāmaï ïmini incæte mönö Codito ïñömö eö togænte bai cædinque minitö baonque ante mini wiwa cægäinö ante wido cæcä ate minitö tæiyæ waëmō entawente quëwëminipa. ¹² Wængongui nē tæi piñænongä inte Itota ingante angä ñāni ömæmongacäimpa, ante wede pönëmini inte minitö, Itota tönö godongämæ näñe wænte bai ïmompä, ante æpænë guiminitapa. Ayæ adobai adocä nē tæi piñænongä ingante wede pönëninque minitö æpænë guidinque Itota tönö ñāni ömæmonte godongämæ tao gongænte quëwëminipa.

¹³ Doyedē ēñenāmaï cædinque do wænguënëmini ingaimini inte minitö inguipogaque ante mini cæinëwëno ante ee mongæñöminite Wængongui angä ate minitö Itota tönö ñāni ömæmonte quëwengaminipa. Edæ wënæ wënæ mini cægäinö ante adinque Wængongui pönö ñimpo cæcä quëwëminipa. ¹⁴ Minitö parte wæquinque ēñenāmaï cæminipa, ante Wængongui wæde wæde ante wææ angä ēñëninque dodäni adodö adodö ante yewämönāni ate wægämöimpa. Mänömaï mönö ïmonte ancaa wææ änāni wæmō adinque Codito ïñömö mänincoo mönö wægäincoo ante wëä godonte bai cæcä ate dæ batimpa. Edæ awæ timpodäni wëninque Itota Codito mäninö ante do teëmente mongæ mäo wido cægacäimpa. ¹⁵ Ayæ mäniwäa wëninque adocä tæi ëmongä inte wënæidi awënëidi tönö nē änāni nāni wænongüë-

nencacoo gä pe æmpote ö æninque tömengä, Wænoncaincoo nææminipa wænonguiminii, ante bai wadani ayönänite badete tote bai cægacäimpa.

Öönæde mönö entawönö ante æncæte ante cæedäni, ante

¹⁶ Mönö ee aquenönö incæ bitö quimæ cæmii, Quimæ bepii, ante pönö apænte piinte änänitawo. Wængongi beyæ ante ææmæ cæcäimpa, ante apænte ancæ piinänitawo. Wacä mämö i ate becäimpa, ante wæx änänitawo. Guëmanguionæ incæ quimæ cæbii, ante minitö iminite apænte pancæ cædänitawo. Edæ æcæmenque mänömainö ante apænte ancæ cæyönänite minitö wæætë, Tömënanî nâni wæx äninö ante Codito wëä godonte bai cægacäimpa, ante pönëninque guifente wädämaï incæminipa. ¹⁷ Cænguï cænte bai bequï bete bai mönö önöwoca beyæ Codito incæ mönö guëmanguimämo bai inongä ingampa. Ininque Codito ingante ænte entawëninque mönö æbänö cænte bai guëmante bai quëwenguï, ante odömoncæte ante cædinque dodäni inömö öwocodenganque odömonte bai cædinque wæx angadänimpa. Mänömaï beyænque tömënanî, ïimaï cæedäni, ïimaï beedäni, ïimaï guëmæedäni, ante wæx angadänimpa.

¹⁸ Pancadäniya mä pönëninque, Önömonque bai inömö inte mönö anquedoidi inänite waa adinque waa cæcäimpa, ante babæ ante wæx anewënanipa. Ayæ mönitö änö bai cædämaï ininque edæ minitö ænte entawönö ænämaï inte wæbäiminipa, ante anewënonäni minitö wæætë guifente wädämaï iedäni. Edæ, Mönitö ate bai do adimöni inte ämöni ëñeedäni, ante tömënanî Codito Önöwoca ingante ewocadämaï inäni inte mä pönëninque anewënanipa. Edæ, Nämäneque ante pönëninque tömënanî, Mönitö adomönique waa cæmöni imönipa, ante nämä waa adänipa. ¹⁹ Mönö

ocai encamö inte cængui cæninqe mönö baonga wepämë tömäo gogadinque pæmompä. Ayæ adobaï mönö ocai encadinque oguëmë tönö baö beyæ cöñe pö cöñe pö cæmompä. Mönö pönencabo adobaï Codito tönö adoyonque bai inñomonte tömengä Önoncamö bai inongä inte në angä ingampa. Mönö mänömaï imö incæte tömënäni wæætë në Önoncamö bai inongä ingante Baa äninque nämä wido tote wææinö bai edæ wadæ godänipa. Ininque wææinö bai inäni incæ minitö iminite wææ änäni apa quëwëminii.

²⁰ Wëenëñedë inguipogaque ante näni wææ angainö ante në ëñengaimini incæte ñöwo wæætë Codito tönö godongämæ wänimini inte minitö wænte bai imini inte mänine ante ædö cæte ëñenguimiiii. Inguipogaque quëwëmini iminipa diyæ mänine ante ëñente cæquënëmini inguimiiii. ²¹ “Gampodämaï, Yædæ bedämaï, Bæi ongönämaï,” ante tömënäni näni wææ änewënö ante quinante ëñente cæminii. ²² Inæmpä waodänique edæ, Gampodämaï, ante näni änoncoo inñömö tæcæ ænte cæyömini edæ dobæ wote ba apa ëñëwëminii. Inguipogaque quëwënäni näni änewengainö ante ëñëninque tömënäni wææ änänipa. Dodäni näni odömonte apænegainö ante ëñëninque wææ änänipa. ²³ Tömënäni, Önömonque bai inömö inte mönö anquedoidi inänite waa adinque waa cæcæimpa, ante wææ änewënänipa. Ayæ mä pönëninque, Cædämaï, Cædämaï, ante nämä baö incæ pänänipa. Inäni ocai encadönäni inte wææ änänipa, ante pönëninque wadäni edæ wæætë oda cædänipa. Inæmpä, Cædämaï, Cædämaï, ante näni wææ änewënö wiï eyepæ i ininque në ëñënäni inguipogaque näni cæinëwënö ante godömenque wiwa cædänipa, ante ämo ëñëmaimಿನိ.

3

¹ Ìninqe mōnō Codito nē ñāni òmāemongaingā tōnō nē ñāni òmāemongaīmīni inte mīnitō æmonga ongoncoo edæ æīnente pōnēedāni. Codito ñōwo Mæmpo Wængonguī tōmēmængā ìnō æi tæ contate ongongampa, ante pōnēninqe edæ mīnitō, Æmonga pōnī nē quēwengā tōmengā nānō entawēnō baī adobaī entawengæīmpa, ante æīnente wædinque quēwēedāni. ² Inguipogaque mōnō quēwēmāmo ante edæ wædāmaī inte wæatē æmonga mōnō quēwenguīnō ante cōwē pōnente quēwēedāni. ³ Edæ do wænte baī ingaīmīni inte mīnitō ñōwo Codito tōnō Wængonguī nempo awēmō quēwēñōmīnite mīnitō quēwenguīnō ante wīi edonque acæīmpa. ⁴ Mōnō Codito mīnitō quēwenguīnō ante nē pōnongaingā inte ponte a ongōñongā māñīñedē tōmengā ñāō entawēninqe nānō tæī emōmāmodē mīnitō adobaī tōmengā tōnō a ongōmīni acæīmpa.

Inguipogaque ante wægaīmō inte mōnō mīimō quēwēmō

⁵ Mānōmaī impa, ante wædinque mīnitō inguipogaque ante mīni cæīnēwēnō ante wænonte baī æmæwo wido cæedāni. Nānōogængā ìnāmaī ìñongante godō mōnāmaī ee aedāni. Wīwa mīni pōnēwēnō ante æmæwo wido cæedāni. Wacā ingante mīni toīnente wædō ante æmæwo wido cæedāni. Wīwa mīni cæīnēwēnō ante æmæwo wido cædinque ee ate quēwēedāni. Mīni māincooque ante æīnēwēnō ante æmæwo wido cæte ñīmpo cæedāni. Edæ māincoo ante æīnente nē wæcā ìñōmō tōmengā, Māincoo incæ botō wængonguī impa, ante baī wæcā apa cæmīnī. ⁶ Nē ēñēnāmaī cædāni inguipogaque nāni cæīnēwēnonque ante cæyōnānite Wængonguī nānō pīinguīmāmo oo ponguīnō anguēnē. ⁷ Mīnitō incæ doyedē inguipogaque ante quēwēninqe adobaī mīni cæīnēwēnonque ante cægaīmīni ìmīnīpa. ⁸ Ñōwo guiquēnē ænguī badāmaī ìedāni. Aīmīni badāmaī

iedäni. Püinte cædämaï iedäni. Babæ godö wënæ wënæ
 änewënämaï iedäni. Wīwa apænedämaï iedäni. Wæætē,
 Idæwaa wënæ wënæ cæte awædö, ante mäninö tömänö
 ñimpo cæte ee aedäni. ⁹ Wëenëñedē mīni entawen-
 gaimāmo ante wido cædinque mäniñedē mīni cægainö
 ante adobaï nē wido cædimīni inte ñowo iñömö edæ wacä
 ingä wacä ingä babæ wapiticæ apænedämaï iedäni.

¹⁰ Wæætē mīmīni edæ quëwencæmīnimpa, ante Wæn-
 gonguï do pönö badongä entawëmīnipa. Ayæ mäninö
 ante nē Badongaingä iñömö cöwē pönö odömonte
 apæneca ēñëninque mīnitö mīmīni quëwëmīni inte tö-
 mengä nänö entawënö baï godömenque godömenque
 adobaï entawëmīni bamīnipa. ¹¹ Mönö Codito nempo
 adoyömö pöni inömö inte mönö guidiegoidi incæ ood-
 eoidi incæ adomö inömö imompa. Nē ëö togæināni incæ
 bagäadāni incæ adomö inömö imompa. Waodāni incæ
 cowodëidi incæ adomö inömö imompa. Wacä beyænque
 nē cæte quëwënāni incæ abæ tawænte ee gote baï nämä
 beyænque nē cæmöni incæ mönö tömämö adomö pöni
 inömö imompa. Edæ mönö tömämö Codito adocanque
 nempo quëwëninque tömengä adocanque ingante nē
 ëwocamö imompa.

¹² Wængonguï, Mīnitö botö quimīni badinque tæiyæ
 waëmö bacæmīnimpa, ante mīnitö imīnite waadete
 pönëninque do apænte ængacäimpa. Ìninque tömengä
 nänö nē apænte ængaimīni inte mīnitö wadāni inānite
 waadete pönente godö waa cæedäni. Nämä önömoque
 baï imopa, ante pönëedäni. Wadāni inānite ædæmö
 cæedäni. Æiquedö waa cæquīnāni, ante wædämaï inte
 piyænē cæte quëwëedäni. ¹³ Ayæ wacä nänö cæinënö
 ante cæcä adinque mīnitö pīnāmaï ee amīni cæcæedäni.
 Wacä adobaï mīnitö imīnite wīwa cæcä ate wædinque
 mīnitö godö ñimpo cæmīni quëwencæcäimpa. Edæ

mönö imonte mönö Awënë nänö ñimpo cægai bai minitö adobai pīināmaī inte godö ñimpo cæedāni. ¹⁴ Ayæ, Adocabomö mönö baquinque mönö waadete pönengæimpa, ante pönëninque minitö täno wadāni inānite waadete pönëninque ayæ tömënāni inānite mini godömenque cæquënënö ante cæedāni. ¹⁵ Minitö adocabomīni badinque piyænë cæte quëwencæminimpa, ante Wængonguī minitö imīnite aa pegacäimpa cæminii. Mönö Awënë Codito nänö piyænë cædö pönongä æninque minitö piyænë cæte quëwëedāni. Ayæ Wængonguī ingante cöwë waa ate pönente quëwëedāni.

¹⁶ Mönö Codito nänö apænegainö ante ëñëninque mīnitö ædæmö entawëninque nanguī ëñente baedāni. Īninque nanguī ëñëmīni badinque mīni cabo incæ wacä ingä wacä ingä godongämæ odömonte apæneedāni. Ayæ nanguī ëñëmīni inte minitö wacä ingä wacä ingä waadete pönëninque, Īmaī cæcäimpa, ante apæneedāni. Ayæ dodāni Wængonguī ingante waa adinque ämotamīni ante nāni yewæmongainta adinque mīnitö wæætë adodö tee empote äedāni. Ayæ Itota Codito nänö cægainö ante pönëninque ämotamīni äedāni. Ayæ adobai Wængonguī Önöwoca pönö apænecä ëñente ëwocadinque mīnitö ämotamīni ante adodö tee empote äedāni. Mänömaī ämotamīni äninque Wængonguī ingante cöwë waa ate pönëninque äedāni. ¹⁷ Ayæ æbämenque ante apænemīni incæ æbämenque cæmīni incæ mīnitö, Mönö Awënë Itota ëmowo beyæ impa, ante tömää cæedāni. Ayæ tömengä pönö cæcä beyænque mīnitö eyepæ inte Mæmpo Wængonguī weca pöninque tömengä ingante waa ate pönëninque apæneedāni.

Mönö godongämæ quëwencabo ĩmaī cæte quëwengæimpa

¹⁸ Onquiyæmīni ëñëedāni. Mönö Awënë nempo quëwëninque mönö ëñente cæcäimpa, ante wædinque

mīnitō nānōogænāni inānite Ao ante ēñente cæedāni.
¹⁹ Onguiñæmīni ēñeedāni. Mīnitō nānōogænāni inānite ædæmō waadete pōnēninque tōmēnāni inānite pīinte cædāmaī iedāni.

²⁰ Wēñæmīni ēñeedāni. Mīnitō mæmpoidi inānite ædæmō ēñente cæedāni. Edæ mǎnōmaī cæmīni ad-
 inque mōnō Awēnē, Waa pōni cæbi abopa, ancæcāimpa.
²¹ Wæmpomīni ēñeedāni. Mīnitō, Ancaa āmo baī botō wēñængā ænguī badinque guingo imonte wæquēnengā, ante pōnente wædinque wæætē wēñænāni inānite nan-
 guī ānāmaī inte waadete pōnō cæedāni.

²² Wacā nānō nē ō ænimīni inte tōmengā beyænque nē cæte quēwēmīni iñōmō ēñeedāni. Mīnitō imīnite nē ō ængaingā ingante nē cæmīni inte mīnitō tōmengā nānō ā baī tōmāā ēñente cæedāni. Edæ, Awēnē Wængonguī incæ botō imote cōwē acampa diyæ, ante guīñente wæd-
 inque mīnitō imīnite nē ō ængaingā nānō ayedē incæ tōmengā nānō adāmaī iñedē incæ cōwē ēñente cæedāni. Waodānique botō imote waa acædānimpa, ante pōnēnā-
 maī inte mīnitō nō pōnēninque cōwē ēñente cæedāni.
²³ Æbāmenque cædinque mīnitō, Wīi waocā beyænque ante cædinque botō Wængonguī Awēnē beyænque ante cæcæboimpa, ante pōnēninque tæi ewocadinque ee cæedāni.
²⁴ Mōnō Awēnē iñōmō tōmengā do nānō angainō baī cædinque mīnitō cægainō beyæ ante eyepæ pōni pōnongā æncæmīnimpa. Mǎnōmaīnō ante pōnente cæedāni. Edæ, Mōnō Awēnē Codito ingante adocanque ingante nē cæmīni imīnīpa, ante āmo ēñēmaīmīnīpa.
²⁵ Nē wēnæ wēnæ cæcā guiquēnē tōmengā nānō wēnæ wēnæ cægainganca eyepæ æncæcāimpa. Edæ Wængonguī iñōmō wacā ingante wadō wacā ingante wadō ate pōnēnāmaī inte tōmāmō imonte apænte āninque pōnō nō pōni paga cæcæcāimpa.

4

¹ Awënëidi eñeedäni. Minitö waocä ingante nē ö ænimini inte eñeedäni ämopa. Edæ minitö Awënëidi imini bai minitö iminite nē Ængaingä incæ adobai minitö Awënë inongä inte öönädë quëwengampa cæminii. Minitö beyænque cæte nē quëwënëni inänite minitö nöingä cædinque tömënëni nāni ænguënënö ante adinque eyepæ pædæ godömini æncädänimpa.

² Wængongui ingante cöwë apænedinque, Tömengä æbänö cæcää, ante cöwä adinque tömengä ingante waa ate pönëninque apæneedäni. ³ Codito æbänö cæcää, ante dodäni nāni eñenämaï ingäine incæ botö mänine ante do eñënimö inte apænebo beyænque botö imote tee mönedäni wæbopa. Incæte mönitö mänine ante apæneyömöni minitö wæætë mönitö beyæ ante Wængongui ingante apænedinque iïmaï ante apæneedäni ämopa. Wængongui eñëmi. Bitö wi ænete bai cæbi ate Pabodoidi nāni apæneede wadäni mimönë guicäimpa, ante apæneedäni. ⁴ Codito æbänö cæcää, ante botö edonque apænequënëmo imopa. Ininque minitö botö beyæ ante apænedinque, Pabodo edonque apæneccäimpa, ante Wængongui ingante apæneedäni ämopa. ⁵ Wadäni inänite bee tëninque minitö ocai encamini inte eñente cæedäni. Pönënamäi inäni do eñencädänimpa, ante waa apænete cæedäni. ⁶ Ayæ Wængongui waadete pönö apæneccä eñëninque minitö adobai wadäni inänite waadete pönö apænedinque waa pönï apæneedäni. Wadäni, Æbänö iï, ante eñencæte ante wæyönänite minitö wæætë nö pönï eñëmini inte nöingä apænemini eñencädänimpa.

Waa quëwencæminimpa, änänipa

⁷ Botö Pabodobo æbänö quëwëmo, ante nē eñëningä inte Tiquico ñöwo minitö weca pöninque mäninö

ante apæ necä eñencæminimpa. Tömengä mönō tōniñacä bai iñongante mönitō tömengä ingante waa waadete pönemōnipa. Tömengä mönō Awënë nempo quëwëninque mönitō tönō godongämæ cæcä iñongä inte mönō pönencabo tömämō imonte pönëninque mönō beyæ cōwë ædæmō cæcä ingampa. ⁸ Mīnitō, Pabodoidi æbänō quëwënānii, ante eñencæte ante wæmīnitawo. Edæ, Tiquico mäninō ante apænedinque mīnitō imīnite ædæmō apæ necä eñëninque mīnitō wampo pönencæminimpa, ante cædinque botō ñōwo tömengä ingante mīnitō weca da godōmo pongä aedāni. ⁹ Tiquico goyongä tömengä tönō Önetimo mīni cabo nē iñongä incæ guëa gocæcäimpa. Önetimo cōwë ædæmō cæte nē pönengä ingampa, ante adinque mönitō tömengä ingante waadete pönemōnipa. İninque tömëna iñōmō, Pabodoidi weca æbänō cædānii, ante tömänō ante apæ neda eñencæminimpa.

¹⁰ Botō tönō guëa tee mönete ongongä Aditadoco iñōmō tömengä mīnitō imīnite, Waa quëwëedāni, angampa. Ayæ Bedënabee nänō wænquicä Mäadoco adobaï, Waa quëwencæminimpa, angampa. Tömengä ingante æbänō waa cæquiï, ante do ämo eñëmīnitapa. İninque tömengä pongä adinque waa cæedāni.

¹¹ Ayæ wacä Itota Yoto nāni äñongä adobaï, Waa quëwencæminimpa, angampa. Botō Wængonguï Awënë Odeye nempo quëwënāni beyæ cæyōmo oodeoidi incæ wadāni cædāmaï iñönānite mäninānique botō tönō godongämæ cædinque pönō ædæmō cædāni æninque botō wampo pönentabopa.

¹² Ayæ mīni cabo iñongä inte Epapada iñōmō tömengä Itota Codito ingante nē cædongä inte adobaï, Waa quëwëedāni, angampa. Tömengä Wængonguï ingante nanguï apænedinque, Codotenteidi inānite bitō godō

cæbi ate tōmēnāni picænāni bai bacædānimpa. Ayæ bitō angaiñō tōmānō ante ēñente cædāni inte tōmēnāni tæi piñænte ēwocacædānimpa, ante tōmengā mīnitō beyæ ante cōwē apænecampa. ¹³ Mīnitō beyæ tōmengā nanguī cæcampa. Daoditea iñōmō nāni pōnencabo beyæ adobaī Yedapodi iñōmō nāni pōnencabo beyæ adobaī tōmengā nanguī cæcampa, ante botō nāwangā apænebo ēñeedāni. ¹⁴ Ayæ, Waa bacædānimpa, ante mōnō nē cædongā tōmengā emōwo Odoca tōmengā iñōmō mōnō nē waadecā ingampa. Tōmengā tōnō Deēma, Waa quēwencæminimpa, ante adobaī ānapa. ¹⁵ Ayæ botō Pabodobo beyæ ante wæætē Daoditea iñōmō mōnō tōniñadāni inānite mīnitō, Waa quēwēedāni, æedāni. Diimpa inante, Waa quēwēedā, æedāni. Ayæ Codito ingante nāni pōnencabo tōmēnā oncōnē godongāmæ ponte apæneyōnānite mīnitō wæætē botō beyæ apænedinque, Pabodo, Waa quēwēedāni, angampa, æedāni.

¹⁶ Ayæ iinta botō cadota ante yewæmōinta iinque adinque mīnitō, Daoditea iñōmō Codito ingante nāni godongāmæ pōnencabo adobaī acædānimpa, ante cædinque da godōmini ænte acædānimpa. Ayæ daoditeaidi inānite botō cadota ante yewæmōninta adobaī āmīni da pōnōnāni æninque æedāni.

¹⁷ Ayæ Adoquipo ingante apænedinque, Bitō mōnō Awēnē pōnō angā ēñēnīmi inte bitō cæquēnēnō ante tōmāā ædæmō cæe, æedāni. ¹⁸ Botō Pabodobo tōmēmo ōnompoca yewæmōninque, Waa quēwēedāni, ante tōmēmo emōwo ante yewæmōmopa. Botō æbānō yæguincamē encapote wæboī, ante pōnēninque mīnitō Wængonguī ingante apæneedāni āmopa. Wængonguī waadete nānō pōnō cædō ænte entawencæminimpa, ante māninque ante yewæmōmopa.

Wængongui nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

